



Adresseinformasjon fylles inn ved ekspedering.  
Se mottakerliste nedenfor.

Dato: 26.08.2021  
Vår ref: 20/02602-13  
Deres ref:

## **Tildeling av driftskonsesjon etter minerallova for Bjørkemoen i Voss kommune. Tiltakshavar: NOBI AS.**

### **POST- OG BESØKSADRESSE**

Ladebekken 50  
7066 Trondheim

**TELEFON** + 47 73 90 46 00

**E-POST** [post@dirmin.no](mailto:post@dirmin.no)

**WEB** [www.dirmin.no](http://www.dirmin.no)

**GIRO** 7694.05.05883

**SWIFT** DNBANOKK

**IBAN** NO5376940505883

**ORG.NR.** NO 974 760 282

**SVALBARDKONTOR**

**TELEFON** +47 79 02 12 92

### **1. Tildeling av driftskonsesjon**

Direktoratet for mineralforvaltning med Bergmeisteren for Svalbard (DMF) viser til søknaden om driftskonsesjon datert 19. juni 2020 frå NOBI AS, organisasjonsnummer 933 896 412. NOBI AS, organisasjonsnummer 933 896 412, heretter kalla «Tiltakshavar» eller «Tiltakshavaren», får med dette driftskonsesjon etter minerallova § 43.

Tiltakshavaren får driftskonsesjon for uttak av lausmassar i Bjørkemoen på del av eiegen gnr./bnr. 158/3 og 158/20 i Voss kommune. Mineralførekomsten høyrer til kategorien mineral som grunneigaren eig.

Konsesjonsområdet har eit areal på kring 290 daa og går fram av kart i vedlegg 1.

Etter reguleringsplan «Bjørkemoen masseuttak», vedtatt 14. juni 2018, er området regulert til masseuttak.

DMF gjer merksam på at ein driftskonsesjon gjeven etter minerallova ikkje erstattar krav om løyve, godkjenning, arealplan eller konsesjon etter anna lovgjeving.

### **2. Vilkår for driftskonsesjonen**

Konsesjonen blir gjeven på desse vilkåra:

#### **2.1. Driftsplan**

Drifta skal til ei kvar tid gå føre seg i samsvar med ein driftsplan godkjend av DMF.

Dersom Tiltakshavaren ønskjer å gjere vesentlege avvik frå driftsplanen, skal DMF godkjenne dette på førehand.

DMF kan krevje ny oppmåling og at ajourførte kart og profilar skal sendast inn når DMF finn det nødvendig.



## **2.2. Økonomisk sikkerheit**

Tiltakshavaren blir pålagt å stille økonomisk sikkerheit med NOK 1 130 000, som skildra i punkt 5.11 av vedtaket, for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51.

Den økonomiske sikkerheita skal stillast i form av ein bankgaranti for eit grunnbeløp på NOK 282 500, og deretter årlege avsetjingar til ein bankkonto som det skal etablerast pant i til fordel for DMF slik at Tiltakshavaren ikkje kan råde over kontoen på noko vis, begge deler som skildra i punkt 5.11.

Innan 2 månader etter datoen på dette konsesjonsvedtaket skal Tiltakshavaren ha:

- (i) inngått ein avtale om finansiell sikkerheit med DMF, vedlegg 2;
- (ii) lagt fram påkravsgaranti frå bank som DMF vurderer som tilfredsstillande, vedlegg 3;
- (iii) etablert pantet til fordel for DMF, jf. pantelova §§ 4-4 til 4-6, vedlegg 4.

## **2.3. Bergteknisk ansvarleg**

Det skal utan grunnlaust opphald sendast skriftleg melding til DMF om alle skifte av bergteknisk ansvarleg for eit uttak.

## **2.4. Andre vilkår**

- Konsesjonsgrensa for massetaket skal setjast ut eller markerast i terrenget på ein slik måte at den er lett synleg gjennom heile driftsperioden.
- Sandsvaler: Det skal ikkje føregå uttak av masse i området der sandsvala hekkar i perioden frå mai til og med juli månad. Det skal tilstrebes å bevara hekkeplass for sandsvale i konsesjonsområdet under drift, og dessutan bli tilrettelagt for hekkeplass etter avslutta drift. Det vil seia at det ikkje bør gjerast inngrep, herunder avslutningsarbeid, i området der det hekkar sandsvale. Bratte skrentar må like fullt sikrast i tråd med minerallova § 49, slik at arbeida ikkje medfører fare for menneske, husdyr eller tamrein. I samband med istandsetting av uttaksområdet skal det tilretteleggast for hekkeplass for sandsvale dersom hekkeplassen blir fjerna etter hekkesesongen av drifts- eller tryggingssyn.

## **3. Godkjenning av driftsplan**

DMF godkjenner driftsplanen for Bjørkemoen. Den godkjende versjonen av driftsplanen ligg ved dette konsesjonsvedtaket.

## **4. Høyringsfråsegner med kommentarar frå DMF**

Søknaden om driftskonsesjon har vore på høyring, jf. forvaltningslova § 17, hos desse høyringsinstansane: Voss kommune, Vestland fylkeskommune, Statsforvaltaren i Vestland, Norges vassdrags- og energidirektorat (NVE) region vest, Statens vegvesen region vest, Mattilsynet, Statnett, Voss Energi Nett AS og eigarar av omkringliggende eigedommar.

Høyringsperioden var frå 12. mars 2021 til 19. april 2021.



Frå høyringsfråsegnene har DMF særleg merkt seg dette:

Statens vegvesen:

Statens vegvesen har ingen merknader til at det blir tildelt driftskonsesjon.

*DMF sin kommentar:*

*DMF tar statens vegvesen sitt fråsegn til etterretning.*

NVE:

NVE har ingen merknader i saka.

*DMF sin kommentar:*

*DMF tar NVE sitt fråsegn til etterretning.*

Statsforvaltaren i Vestland:

Attgjeving av Statsforvaltaren i Vestland sitt høyringsfråsegn:

**«Om observasjon av truga artar i området**

Søk i Naturbase viser ikkje viktige naturtypar i det aktuelle området. Søk i Artskart i mars 2021 viser ei rekkje observasjonar av artar i området, men mange av desse er av eldre dato, t.d. observasjon av vipe (EN – sterkt truga) frå 1978, og med usikker geografisk presisjon. Etter vår vurdering kan observasjon av hekkande sandsvale frå år 2000 framleis ha relevans, sjølv om det er usikkert om arten framleis hekkar her. Sandsvala er raudlista som «nær truga» (NT), og hekkar i større eller mindre koloniar, ofte i sandtak med bratte skjeringar, der kvart par grev ut eit hol dei plasserer reiret sitt i. Naturmangfaldlova slår fast at ein ved ein kvar aktivitet skal unngå unødig skade og lidning på viltlevande dyr og deira reir, bo eller hi, jf. § 15. Sandsvalene si hekketid strekkjer seg frå seint i mai til langt ut i august. I denne perioden bør ein sjå etter reirhol (slike ligg oftast øvst i skjeringa), og unngå å øydelegge skjeringa der slike blir oppdaga.

**Det er forbode med partikkelavrenning til vassdrag**

Vassdraget er anadromt, og del av nasjonalt laksevassdrag. I nasjonale laksevassdrag skal laksen sikrast ein særleg beskyttelse mot skadeleg inngrep.

Eventuell avrenning kan føre til auka dødelegheit på rogn/ynge som ligg i grusen, og tiltaket kan ikkje føre til avrenning mot vassdraget. Ei omsynssone/naturvernsone på 50 meter er truleg tilstrekkeleg for å hindre det. Vi legg likevel til grunn at det blir vurdert og gjennomført ytterlegare tiltak dersom det er naudsynt for å hindre avrenning. Med tanke på at det er eit nasjonalt laksevassdrag og eit verna vassdrag, bør utsleppssituasjonen bli følgd opp nøye med til dømes tilsyn og/eller undersøkingar.

**Det kan bli naudsynt å regulere utslepp med løyve**

Det kan vere naudsynt å regulere utslepp frå uttaket gjennom eit løyve etter forureiningslova § 11. Dersom det blir gitt driftskonsesjon må verksemda sende inn søknadsskjema om utsleppsløyve for industribedrifter til Statsforvaltaren. Søknadsskjema ligg på nettstaden vår.

<https://www.statsforvalteren.no/vestland/skjema-og-tenester/?c=263628>



### **Mineralavfall**

Kapittel 17 i avfallsforskrifta handlar om handtering av mineralavfall. I eit eventuelt driftsløyve bør det nemnast at verksemda må etterkome reglane i forskrifta viss det oppstår mineralavfall ved verksemda.

### **Regulering av knuseverk**

Statsforvaltaren er kjent med at det er aktivitet på staden som er regulert av kapittel 30 i forureiningsforskrifta om forureining frå produksjon av puk, grus, sand og singel. Den set krav til utslepp til vatn, støv og støy. Ved endring eller utviding av aktiviteten på området skal den ansvarlege sende melding til Statsforvaltaren med naudsynte opplysningar om verksemda.»

*DMF sin kommentar:*

*DMF gjer Tiltakshavar merksam på Statsforvaltaren i Vestland sitt høyringsfråsegn. På bakgrunn av fråsegna har DMF satt vilkår om at det ikkje skal føregå uttak av masse i området der sandsvala hekkar i hekkeperioden, sjå vedtakets punkt 2.4 og 5.7.*

*Når det gjeld vassdrag uttaler Statsforvaltaren at ei omsynssone/naturvernssone på 50 meter truleg er tilstrekkeleg til å hindre avrenning. DMF sett ikkje vilkår om at det skal gjerast undersøkingar, men oppfordrar Tiltakshavar til å vere merksam på om sona er tilstrekkeleg. DMF viser til vurderingane om vassdrag i konsekvensutgreiinga.*

*DMF gjer Tiltakshavar merksam på fråsegna om at dei må sende inn søknad om utsleppsløyve.*

*DMF har vidare merka seg Fylkesmannens fråsegn om kapittel 17 i avfallsforskrifta og forureiningsforskrifta kapittel 30. DMF føreset at Tiltakshavar set seg inn i gjeldande regelverk og at dette følges. DMF ønsker vidare å merke at ei tillating etter minerallova, herunder driftskonsesjon, ikkje erstattar krav om andre løyve, godkjenning, arealavklaring eller konsesjon etter anna lovgiving, jf. minerallova § 5.*

## **5. Korleis DMF vurderer søknaden om driftskonsesjon**

Føremålet til minerallova er å fremje og sikre samfunnsmessig forsvarleg forvaltning og bruk av mineralressursane i samsvar med prinsippet om ei berekraftig utvikling.

Etter minerallova § 43 er det krav om driftskonsesjon frå DMF for samla uttak av mineralførekomst på meir enn 10 000 m<sup>3</sup> masse og for alt uttak av naturstein. Berre den som har utvinningsrett kan få driftskonsesjon.

Konsesjonssøknader går gjennom ei skjønsmessig prøving før det blir avgjort om det skal gjevast driftskonsesjon. I vurderinga av om det skal gjevast driftskonsesjon skal det leggast vekt på om søkjaren er "skikka" til å utvinne førekomsten. Dette inneber at ein skal leggje vekt på om prosjektet ser ut til å vere økonomisk gjennomførbart, om det blir lagt opp til bergfagleg forsvarleg drift, og om søkjaren har tilstrekkeleg kompetanse til å drive førekomsten. I vurderinga av om det skal gjevast driftskonsesjon skal det òg leggast vekt på omsyna som er nemnde i minerallova § 2.

DMF kan fastsette vilkår for ein driftskonsesjon. Når DMF avgjer kva vilkår som skal stillast, vurderer direktoratet mange av dei same omsyna som er relevante for vurderinga av om det skal gjevast konsesjon.



DMF har vurdert konsesjonssøknaden slik:

### **5.1 Utvinningsrett**

Mineralførekomsten som skal utvinnast tilhører kategorien mineral som grunneigaren eig. Tiltakshavaren er ikkje grunneigar for konsesjonsområdet, og det blir difor kravd avtale med grunneigaren om utvinningsretten til førekomsten. Tiltakshavaren har i søknadsprosessen lagt fram avtalar med grunneigarane for gnr./bnr. 158/3 og 158/20.

For gnr./bnr. 158/3 har DMF motteke avtale om utvinningsrett mellom tidlegare grunneigar Nils R. Bjørke og Voss Cementvarefabrikk av 4. desember 1970 og tillegg til kontrakten frå 1981, 1991, 2001 og 2009. Voss Cementvarefabrikk (org.nr. 917 240 485) har seinare bytta namn til NOBI Voss AS. Selskapet vart i 2020 fusjonert med NOBI AS. I kontrakten gis det rett til å driva og å ta ut sand/grus tilhøyrande Nils Bjørke «eller den som måtte overta garden». Frå oktober 2012 er Jostein Bjørke ny grunneigar. DMF har motteke brev frå Jostein Bjørke til Voss Cementvarefabrikk om at han har overteke og at alle førespurnader og oppgjer skal skje til ham. DMF har derfor ikkje bedt om oppdatert avtale om utvinningsrett med aktuell grunneigar som avtalepart.

For gnr./bnr. 158/20 har DMF motteke avtale mellom Voss Cementvarefabrikk og Bjørke Sandtak AS av 18. desember 2001 samt tillegg til avtale av 20. juni 2014. Sistnemnde er signert av noverande grunneigar Erling Bjørke for Bjørke Sandtak. I avtalen frå 2001 står det at uttaksretten ikkje kan overdras utan samtykke frå Bjørke Sandtak. Ved fusjon er hovudregelen at det overtakande selskapet overtar alle rettighetane til det overdragande selskapet. På grunn av klausulen i avtalen har DMF fleire gonger prøvd å få tak i Erling Bjørke/Bjørke Sandtak på telefon for å få bekrefte at dei har samtykka til at utvinningsretten er overteke av NOBI AS, men vi har ikkje fått svar på telefonen. Bjørke Sandtak og Erling Bjørke stod på høyringslista og har ikkje sendt inn høyringsfråsegn. DMF legg derfor til grunn av utvinningsretten er overteke av NOBI AS.

Avtalane gjev Tiltakshavaren utvinningsrett til førekomsten på det området det er søkt om konsesjon for i avtaleperioden.

Etter DMF si vurdering har Tiltakshavaren utvinningsretten til førekomsten. DMF minner likevel om at ein driftskonsesjon ikkje inneber ei avgjerd om privatrettslege forhold og at driftskonsesjonen fell bort viss utvinningsretten blir sletta.

### **5.2 Arealstatus for tiltaket**

Konsesjonsområdet har eit areal på kring 290 daa og går fram av kart i vedlegg 1.

Etter reguleringsplan «Bjørkemoen masseuttak», vedtatt 14. juni 2018, er området regulert til masseuttak.

### **5.3 Økonomien i prosjektet**

DMF har vurdert årsrekneskapen med styret si årsmelding og notar for dei siste 2 åra. På grunnlag av opplysningane som er gjevne vurderer DMF bedrifta som økonomisk skikka.



#### **5.4 Driftsplan**

For å sikre at kravet om bergfagleg forsvarleg drift blir oppfylt, finn DMF grunn til å ta inn i konsesjonen eit vilkår om at drifta til ei kvar tid skal gå føre seg i samsvar med ein driftsplan godkjend av DMF.

Driftsplanen skal vere eit styringsverktøy for Tiltakshavaren i gjennomføringa av uttaket, og eit referansedokument i samband med DMF sine tilsyn.

I samband med søknaden har Tiltakshavaren lagt fram eit framlegg til driftsplan for uttaket.

Framlegget til driftsplan omfattar heile driftsperioden og avsluttinga av grustaket. Skildringa og kart- og snitt-teikningar presenterer det planlagde uttaket av førekomsten innanfor arealet på 290 dekar. Det totale volumet grusreservar som skal takast ut ned til botnkoten på 94 moh. er estimert til kring 1 400 000 tonn. Det årlege uttaket vil variere med marknaden, men det planlagde uttaket per år er 150 000 tonn. Utdrivne område som ikkje trengst i den vidare drifta, skal setjast i stand fortløpande. I tillegg til driftsfasane er det lagt fram ein plan for sikring og avslutting av grustaket.

Etter DMF si vurdering kan den vedlagde versjonen av driftsplan for Bjørkemoen godkjennast. DMF finn at planen tilfredsstillar dei krava som DMF stiller til driftsplanar, og etter DMF si vurdering legg planen opp til bergfagleg forsvarleg drift.

Dersom det under drifta oppstår nye situasjonar eller andre endringar i føresetnadene for drifta, til dømes geologiske og kvalitetsmessige variasjonar, bør det likevel på visse vilkår kunne opnast for å gjere endringar og tilpassingar i planen. Dersom Tiltakshavaren ønskjer å gjere vesentlege avvik frå driftsplanen, skal DMF godkjenne dette på førehand.

Undervegs i drifta kan DMF få bruk for oppdaterte kart og snitt som dokumenterer den noverande situasjonen i uttaksområdet og status i høve til den godkjende driftsplanen. Det blir difor teke inn som eit vilkår i konsesjonen at DMF kan krevje at Tiltakshavaren gjer ny oppmåling og at ajourførte kart og profilar skal sendast inn når DMF finn det nødvendig.

#### **5.5 Bergfagleg forsvarleg drift**

Kravet om at drifta til ei kvar tid skal gå føre seg på ein bergfagleg forsvarleg måte inneber at aktiviteten må vere i samsvar med tilfredsstillande faglege standardar for denne typen verksemd.

Etter DMF si vurdering er den føreslegne driftsplanen for uttaket bergfagleg forsvarleg. Ved vurderinga har DMF lagt vekt på driftsplanen for uttaket.

#### **5.6 Kva kompetanse søkjaren har til å drive førekomsten**

I vurderinga av om søkjaren har tilstrekkeleg kompetanse er det den totale kompetansen som søkjaren har tilgang til som skal vurderast opp mot kravet om å vere skikka.

Etter forskrift til minerallova § 3-1 skal alle uttak av mineralske ressursar ha ein bergteknisk ansvarleg.



Tiltakshavaren har i søknaden gjeve opp Tom Arve Bøthun som bergteknisk ansvarleg for uttaket. Personen er registrert hos DMF som bergteknisk ansvarleg for uttaket og oppfyller kvalifikasjonskrava i forskrifta.

Etter DMF si vurdering har Tiltakshavaren tilstrekkeleg kompetanse til å drive førekomsten.

### **5.7 Miljøkonsekvensar av utvinninga**

I vurderinga av om det skal gjevast driftskonsesjon skal det leggjast vekt på omsynet til miljøet, og DMF kan setje vilkår i konsesjonsvedtak for å sikre miljøomsyn.

Det finst ein godkjend reguleringsplan for uttaket. I samband med planprosessen er det gjennomført ei konsekvensutgreiing som skildrar miljøverdiar i området og gjer greie for kva konsekvensar uttaket vil ha for miljøet.

#### *Biologisk mangfald – vurdering etter naturmangfaldlova*

Naturmangfaldlova § 7 pålegg alle offentlege instansar som tek avgjerder som påverkar naturen å vurdere planlagde tiltak opp mot prinsippa i naturmangfaldlova §§ 8–12. Reguleringsplanen, konsekvensutgreiinga, høyringsfråsegner og eigne søk i Naturbase og Artskart (gjennomførte den 5. mars 2021) er lagde til grunn for vurderingane etter naturmangfaldlova i DMF si handsaming av søknaden. DMF reknar kunnskapsgrunnlaget etter naturmangfaldlova § 8 for å vere tilstrekkeleg til at det kan fattast vedtak i saka. Føre-var-prinsippet i naturmangfaldlova § 9 gjeld såleis ikkje.

Naturmangfald er behandla som eit eige tema i konsekvensutgreiinga. Her står det at det er venta små konsekvensar for naturmangfald. Ein sone på 50 meter frå vassdrag er regulert til naturvern og ingen inngrep vil skje i denne sonen. Konsekvensen for naturmiljøet vert vurdert som liten negativ.

Etter DMF si vurdering vil slikt uttak av massar som det er søkt om ikkje vere i konflikt med forvaltningsmålet for naturtypar og økosystem som er fastsett i naturmangfaldlova § 4 eller forvaltningsmålet for artar i naturmangfaldlova § 5.

Etter naturmangfaldlova § 10 skal den samla belastinga på økosystem og naturmangfaldet i regionen vurderast.

Store delar av uttaksområdet er i dag nytta til uttak av grusmassar og sandtak. Området er i stor grad påverka av eksisterande massetak, industri, vegar og bygningar. I konsekvensutgreiinga kjem det fram at området har generelt fattige vegetasjonstypar. Naturtypane har til saman avgrensa verdi, med nokon verdifulle element av rik lauvskog langs Kvislielva. Elvestrekningane i området ved massetaket synast å kunne vere gode oppvekstområdar for anadrom fisk. I konsekvensutgreiinga er det vurdert at ved å spara dei næraste 50 metrane av kantsonen til elvane vil ikkje vassmiljøet bli negativt rørt.

DMF støttar seg til vurderingane som er gjort i planprosessen og konsekvensutgreiinga, og har kome til at det ikkje finst avgjerande moment som talar mot å innvilge konsesjon.

Likevel har vi funne grunn til å setje dette vilkåret:



- Sandsvaler: Det skal ikkje føregå uttak av masse i området der sandsvala hekkar i perioden frå mai til og med juli månad. Det skal tilstrebes å bevara hekkeplass for sandsvale i konsesjonsområdet under drift, og dessutan bli tilrettelagt for hekkeplass etter avslutta drift. Det vil seia at det ikkje bør gjerast inngrep, herunder avslutningsarbeid, i området der det hekkar sandsvale. Bratte skrentar må like fullt sikrast i tråd med minerallova § 49, slik at arbeida ikkje medfører fare for menneske, husdyr eller tamrein. I samband med istandsetting av uttaksområdet skal det tilretteleggast for hekkeplass for sandsvale dersom hekkeplassen blir fjerna etter hekkesesongen av drifts- eller tryggingssyn.

Det er tiltakshavaren som skal bere kostnadene ved tiltaka etter naturmangfaldlova §§ 11-12.

### **5.8 Forholdet til omgivnadene og nærliggjande område under drift**

Mineralressursane skal forvaltast og brukast på ein måte som tek omsyn til omgjevnadene og dei nærliggjande områda under drift. Det er difor viktig at drivaren gjennomfører nødvendige sikringstiltak for å unngå skadar på eigedom, menneske og dyr.

Konsesjonsområdet er stengt med bom og adgangskontroll. Alle skråningar og stuffar skal vere sikra med storstein eller ved at massar blir lagt opp som ein barriere ved for eksempel avdekking.

DMF har kome til at dette ikkje er avgjerande moment som talar mot å innvilge konsesjon.

### **5.9 Kva tiltaket får å seie for verdiskaping og næringsutvikling**

Førekomsten det er søkt om driftskonsesjon for fell inn under råstoffgrupperinga sand, grus, pukk og leire (byggjeråstoff). Råstoffet blir brukt i produkt som det moderne samfunnet er heilt avhengig av og som blir brukte i bygg, vegar og anlegg.

Sandtaksdrifta er retta mot produksjon av tilsag til betong, asfalt og vegbygging. Tiltakshavar har sterkt fokus på å utnytta ressursen i sandtaket best mogeleg.

### **5.10 Langsiktig planlegging for etterbruk eller tilbakeføring av området**

Etter avslutta drift skal anlegg og bygningar bli demontert og fjerna. Det skal vere en tilbakeføring og arrondering av området, med botnnivå frå 96,5moh. Skråningar skal ikkje vera brattare enn 1:6.

Etter DMF si vurdering er dei planane som finst for etterbruk eller tilbakeføring tilfredsstillande, og såleis ikkje noko avgjerande moment som talar mot å gje konsesjon.

### **5.11 Økonomisk sikkerheit**

I søknaden om driftskonsesjon har Tiltakshavaren, i samsvar med forskrift til minerallova § 2-1, gjort framlegg til korleis sikkerheit kan stillast. DMF fastset dei endelege krava til sikkerheit.

Tiltakshavar sitt forslag er å vidareføre den økonomisk sikkerheita frå førre konsesjonstildeling. I samband med denne tildeling ble det berekna ein økonomisk





sikkerheit på NOK 700 000, med årlege avsetjingar på NOK 0,44 per tonn utteken masse.

#### **5.11.1. Pålegg om å stille økonomisk sikkerheit og vurdering av kor stor sikkerheita skal vere**

Etter DMF si vurdering er Tiltakshavaren sitt framlegg til kor stor sikkerheita skal vere ikkje tilfredstillande. Etter forskrift til minerallova § 2-1 tredje ledd skal den økonomiske sikkerheita vere tilstrekkeleg til å dekkje Tiltakshavaren si sikrings- og oppryddingsplikt.

Etter ei konkret vurdering av tiltaket finn DMF at Tiltakshavaren skal påleggjast å stille finansiell sikkerheit på NOK 1 130 000 for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51. I vurderinga av kor stor sikkerheit som skal krevjast har DMF lagt vekt på sine egne erfaringstal for tilsvarande uttak, med tillegg for eksterne og uventa kostnader. DMF har i berekninga ikkje teke med arealet avgrensa av gnr./bnr. 158/20.

#### **5.11.2. Form for sikkerheit**

Det skal stillast sikkerheit i ei slik form at den ikkje vil gå inn i konkursbuet i tilfelle konkurs hos Tiltakshavaren, jf. forskrift til minerallova § 2-1 tredje ledd.

Etter DMF si vurdering vil det vere føremålstenleg at den økonomiske sikkerheita blir stilt ved bankgaranti og individuell fondsavsetjing til ein bankkonto som det etter ein eigen avtale om finansiell sikkerheit skal etablerast pant i til fordel for DMF, jf. pantelova §§ 4-4 til 4-6. Tiltakshavaren skal ikkje ha råderett over denne bankkontoen, som skal vere sperra til fordel for DMF.

#### *Bankgaranti – oppstartsfase*

DMF vurderer det som nødvendig at Tiltakshavaren, innan 2 månader etter datoen då konsesjonsvedtaket blei gjort, stiller ein bankgaranti som DMF vurderer som tilfredsstillande som påkravsgaranti for eit beløp på NOK 282 500. Dette er nødvendig for å ha tilstrekkeleg sikkerheit i oppstartfasen før fondet har nådd maksimal avsetjing. Storleiken på bankgarantien er fastsett på grunnlag av ei vurdering av kva som blir rekna for å vere tilstrekkeleg sikkerheit i denne fasen.

DMF kan fremje krav i høve til bankgarantien i desse tilfella:

- (i) Etter utløpet av Tiltakshavaren sin frist for å utføre nødvendige sikrings- og oppryddingstiltak som DMF godtek;
- (ii) Ved konkurs, opphøyr eller anna avvikling av Tiltakshavaren si verksemd; og
- (iii) Dersom konsesjonen blir trekt attende.

Ved melding til garantisten om at eitt av tilfella nemnde i punkt (i)–(iii) over har oppstått, skal DMF ha rett til å få utbetalt det kravet som blir gjort gjeldende etter bankgarantien, utan omsyn til motsegner frå Tiltakshavaren. Bankgarantien skal stå ved lag så lenge beløpet som står på bankkontoen ikkje har nådd NOK 282 500. Når beløpet på bankkontoen har nådd NOK 282 500, eller tidlegare etter skriftleg samtykkje frå DMF, fell plikta til bankgaranti bort.



#### *Individuell avsetjing, avsetjingsperiode og storleiken på avsetjinga*

Deretter skal Tiltakshavaren setje inn midlar på bankkontoen årleg fram til totalbeløpet på NOK 1 130 000 er nådd. Dei årlege innskota blir rekna ut etterskotsvis på grunnlag av masseuttaket året før. Det skal betalast inn NOK 1,08 årleg per tonn utteken masse.

Ved fastsetjinga av satsen per tonn utteken masse har DMF lagt til grunn at fondet skal byggjast opp over ein periode på 7 år, det vil seie NOK 161 428,57 per år. I søknaden er det rekna med eit uttak på 75 000 m<sup>3</sup>/år, tilsvarande om lag 150 000 tonn/år, noko som gjev ei årleg avsetjing på NOK 1,08 per tonn.

Innbetalinga for masseuttaket må vere avsett innan 1. februar året etter.

#### **5.11.3. Rapportering og dokumentasjon**

Beløpet som står på kontoen skal dokumenterast årleg ved å gje DMF tilgjenge til ei oppdatert kontoutskrift. All avkasting på midlane skal godskrivas kontoen.

I tillegg finn DMF det nødvendig at Tiltakshavaren undervegs i drifta vurderer om den sikkerheita som er stilt er tilstrekkeleg til å dekkje kostnadene til sikrings- og oppryddingstiltak og gjev DMF tilbakemeldingar om dette. Dersom den fastsette driftsperioden for uttaket blir endra eller det skjer andre vesentlege endringar i driftsplanen, skal DMF informerast utan grunnlaust opphald. Elles skal tiltakshavaren kvart femte år gjere ei ny vurdering av om sikkerheita er tilstrekkeleg. Når vurderinga er gjord, skal tiltakshavaren utarbeide ein rapport og sende den til DMF utan grunnlaust opphald.

DMF kan òg ha behov for meir rapportering og dokumentering enn det som er skildra over, og finn det difor nødvendig å påleggje Tiltakshavaren plikter i så måte i konsesjonsvilkåra.

#### **5.11.4. Justering av sikkerheita**

Etter forskrift til minerallova § 2-2 første ledd andre punktum kan DMF gjere vedtak om endring av storleiken på avsetjinga, inkludert dei årlege innbetalingane frå Tiltakshavaren, og tidspunktet for innbetaling. Slike endringar kan òg gjerast når som helst ved endringar i minerallova og andre relevante lover, forskrifter og vedtak.

## **6. Kor lenge driftskonsesjonen gjeld**

Driftskonsesjonen kan reviderast etter 10 år.

Driftskonsesjonen fell bort dersom drift ikkje er starta opp seinast fem år etter at konsesjonen er gitt. Det same gjeld dersom drifta blir innstilt i meir enn eitt år. Det kan søkjast til DMF om å forlengje desse fristane. Driftskonsesjonen fell òg bort dersom:

- utvinningsretten for statens mineral blir sletta
- avtalen om rett til å utnytte førekomst av grunneigars mineral går ut
- skjønn ikkje er kravd innan eitt år etter at ekspropriasjonsløyve er gitt etter minerallova § 37 andre ledd bokstav a

Driftskonsesjonen kan ikkje overdragast. Det gjeld òg ved overdraging av utvinningsretten.



## 7. Plikter for tiltakshavaren

Tiltakshavaren har rettar og plikter som følgjer av minerallova med forskrifter.

### **Meldeplikt ved oppstart og stans av drift**

Seinast éi veke før oppstart av drifta skal tiltakshavaren sende melding til DMF. Tiltakshavaren skal òg sende melding til DMF før drifta mellombels blir stansa eller lagd ned i medhald av minerallova § 44.

### **Drifta skal utførast med varsemnd**

Drifta skal utførast med varsemnd, slik at skadane ikkje blir større enn nødvendig. Etter minerallova § 48 skal arbeida heller ikkje føre til unødig forureining eller skade på miljøet.

### **Forsvarleg sikring og opprydding**

Området skal sikrast slik at arbeidet ikkje medfører fare for menneske, husdyr eller tamrein. Etter minerallova § 49 omfattar sikringsplikta òg gruveopningar, tippar og utlagde massar på område som er knytte til konsesjonsområdet.

Etter minerallova § 50 skal området vere forsvarleg rydda mens arbeida går for seg. Etter minerallova §§ 49 og 50 skal området vere forsvarleg rydda og varig sikra etter at arbeida er avslutta. DMF kan fastsetje ein frist for når oppryddinga skal vere avslutta.

### **Ansvarlet til bergteknisk ansvarleg**

Bergteknisk ansvarleg har eit særskilt ansvar for å sjå til

- at drifta er teknisk forsvarleg og tek omsyn til arbeidstakarar, nærliggjande bygningar og omgivnadene elles
- at førekomsten blir avbygd på ein berekraftig måte
- at drifta til kvar tid er i samsvar med ein ajourført og godkjend driftsplan

### **Rapportering**

Tiltakshavaren skal sende årleg driftsrapport til DMF via «Min side» på [dirmin.no](http://dirmin.no).

Når uttak av grunneigars mineral blir lagt ned, kan DMF stille krav om å sende inn sluttrapport, måledata og prøvemateriale. Dette gjeld dersom uttaket har mineraliseringar av vesentleg geologisk interesse.

## 8. Rett til å klage

Partane i saka og andre med rettsleg klageinteresse kan klage på vedtaket i samsvar med reglane i forvaltingslova kapittel VI.

Fristen for å klage er tre veker etter at de har fått dette brevet. Klagen skal sendast til DMF for ny vurdering. Dersom DMF ikkje finn grunn til å gjere om vedtaket, sender vi klagen til Nærings- og fiskeridepartementet, som gjer endeleg vedtak i saka. I klagen må de gjere greie for kva de klagar på, og kvifor, og de må foreslå endringar.

Etter forvaltingslova § 18 og 19 har partane i saka rett til å sjå saksdokumentata.



Vennlig hilsen

Unni Garberg  
seksjonssjef

Sara Tønne  
rådgjevar

*Dokumentet er elektronisk signert og har difor ikkje handskrivne signaturar.*  
Sakshandsamar: Sara Tønne

Vedlegg:

Konsesjonsområde - Bjørkemoen  
Avtale om finansiell sikkerhetsstillelse  
Påkravsgaranti  
Pantsettelseserklæring  
Godkjent driftsplan - Bjørkemoen

Mottakere:

NOBI AS	Mjølkevikvarden 13	5315 HERDLA
---------	--------------------	-------------

Kopi til:

Statsforvalteren i Vestland	Njøsavegen 2	6863 LEIKANGER
Voss kommune	Postboks 145	5701 VOSS
Adresseliste		
Norges vassdrags- og energidirektorat Region vest	Naustdalsvegen 1B	6800 FØRDE
Mattilsynet	Postboks 383	2381 BRUMUNDDAL
Statnett SF	Postboks 4904 Nydalen	0423 OSLO
Vestland fylkeskommune	Postboks 7900	5020 BERGEN
Voss Energi Nett AS	Postboks 2055702 VOSS	5702 VOSS
Statens vegvesen	Postboks 1010 Nordre Ål	2605 LILLEHAMMER